

安

愚

齋

集

重刻安愚齋集序

嵩憲校栞忠靖夏公集成顧念

國朝人文遠過明代就所知者若蔣天植之栞朱子昭之宣王朗
川之鈇徐遜齋世佐張百川廷祿曾南坡遇唐陳同甫覺民周梔
褐嘉縉黎素盦彬楊木盦先鐸張子任學尹左仲基宗植皆得讀
其詩文以爲難能而二百年來湘人能文者獨推徐遜齋及周半
帆先生遜齋文雄奇奔放不可一世栞行者至六十卷之多先生
書味盎然平澹安愉志和而音雅吾嘗以湘人之文遜齋及先生
擅名一時而仲基爲之後勁湘人之詩晚得吳伯翼淮李枚生杭
最其傑出者而先生爲之先聲是以湘人語文章之盛無過先生
先生與其弟默耕篤志古學皆仕爲知縣號稱儒吏而先生脩然
塵俗之表年五十以母喪去官遂不復仕用經術講授鄉里而是

時府縣初立書院多求大師耆德爲之都講書幣相屬於庭於是先生之名日盛而文亦日充然有得也君子之學無間窮通得喪其中誠有悵然自足者推而達之於人與所以自淑其身各視其境之所值均之寓也必有得於所寓之外盡人世之所營營無足以累其心而後有以希乎古而蘄至於久遠雖其得志行道極富貴之娛亦豈有加於毫末哉而視人世之殊榮超然無所屑意彼誠有足於其心者也故予於先生之文尤有取重焉始先生之文刻藏其家其孫昌輔徵君謬校又搜得其遺稿若干篇意或先生之所刪削而文固各有意旨可觀仲基嘗爲之審訂以授嵩齋謀更槩行之至是竝以授之梓人蓋先生之文流傳且百年而所存止此詩文小道固若是難哉仲基旣卒吾湘能文之士益衰落矣此又可歎也時光緒八年歲在壬午秋九月郭嵩燾謹序

原刻安愚齋詩文集序

予耳半帆先生名久矣歲辛酉陳臬湘南訪而見之相與議論詩文源流升降發鏘啟秘悉如吾意所欲出益歎先生資之敏學之邃人品之高而名之足副其實也夫詩以言志文以明理無所謂古也自唐試士以排律明取士以制藝於是古詩古文之名士子束髮受書日以趨時爲務名成志遂始盡棄去之摹仿剽竊以希乎古欲以求合乎古難矣先生蚤歲成進士綰邑符數載不得展卽歸里授徒歷主名山講席自其幼就外傳卽已沈酣古籍排闥入諸大家閫奧故其詩詞蘊蓄氣味醇厚上與陶謝相頡頏而其論事之文指陳利害往復曲盡雖陸宣公韓文公蘇文忠公未遑多讓聞先生曾因舟行遇風囊篋所藏悉沒於水日久記憶半就遺忘故卷帙無多然文貴傳不在多况先生精力方強三湘重

湖之波濤壯闊祝融嶽麓之雲霞出沒變化盪其心胸恣其游眺
皆足以助其詠吟後此之著述當益富其造詣必更深且遠矣予
幸得與先生訂交文字間每一披讀愛而不釋因亟促之鈐版以
行嗚乎後之讀先生詩文者可以奮然而興矣嘉慶八年八月吳
中韓封序

原刻安愚齋詩文集序

湘陰周半帆先生自爲諸生厭俗學旣成進士而歸友教所至益大肆其力於詩古文辭及授官甯朔驅車塞上西北至阿蘭鄯東南至鄂爾多斯紀邊庭風土之異矢戎索綬馭之宜至於河渠之利病賦役之煩重民食之艱辛上方伯之書三蓮之詩讀之爲心惻況先生之躬泣而目擊者歟由先生之言想先生之治催科撫字之間考之上下其不暇計也審矣先生所著曰安愚齋文集其詩工於抒情而文長於論事雖歸田疾首吏治其言切而盡嗟乎此非先生之得爲也世之愚先生者先生固安之使其讀先生之文有槩於中仁人之言利亦普哉先生詩文未遑手自編次晚應衡永觀察之聘舟覆淪於水令子鴻榮鴻琛搜羅散佚得如千篇錄之爲八卷刻以行庶乎能世其家學香道光二十年七月長沙

後學周樹槐序

安愚齋集目錄

卷一

前詠史八首

後詠史七首

送弟澍甫之永順

之澱浦作

澱浦竹枝詞八首

夷陵覽古泝黃牛峽口迴船作歌

送弟澍甫之均州次劉茶川韻

登黃鶴樓

黃鶴樓小飲至暮

荊州送孫石溪南歸

赤壁夜泊

古意

發襄陽

望紫霄峯作

武昌幕中與素人師論文作

陪素人夫子與諸同人泛舟西陵峽訪三游洞四首

梁冲泉先生新任鄂藩子時在武昌學使幕將南歸匆匆謁於旅次感受知之既久傷岐路之多違臨別索詩因申積

懷云爾

遣興

寄懷梁冲泉先生

洞庭舟次

舟中口號

湖上散步夜歸南泉寺

竟陵同劉茶川南歸舟中話別

旅泊

樊口送人作

示家人

詠史三首

黃梅雨二首

擬古

李彩邦自都中歸得弟湜甫手書竝聞劉茶川凶訃

邨居納涼

題戴尉荷露烹茶圖

秋荷

失題五首

三弟雨蒼亡八年矣承方亭五丈許爲立傳賦詩二百五十
字以道意

秋柳

詠史

途中別友

萱草

送張子歸益陽

送友人之官河北

送別

壽鄒方亭六十

邨夜

春日登雨花臺晚眺

予將以謁選入都訪鄢五丈方亭於淶陽山中泊晚留宿敘別言懷值其誕辰並致稱願之詞云爾

都中贈別長沙太守

卷二

之官甯夏作

次韻孫五石溪見寄之官甯朔之作

蓮草篇

并序

仲秋河上邊風乍起仰視飛雁如雲從西北來渡河南翔至夕不絕感賦此篇

承天寺西夏斷碑歌

巡視渠工二首

青銅峽三首

塞上絕句十四首

衙退口占二首

望賀蘭山作

青銅峽大禹廟二律

有持山谿春種圖索題上無款識玩之則吾江南農田小景也感而書之

重陽日雙井道中酬楊蓉裳刺史

朔方懷古四首

甯夏採風古體八首

沙灘田

糧草稅

渠工稅

堡渠長

賣兒詞

兩番部

裁絨毯

小蕩子

九月九日蘭州道中懷弟湜甫

題菊花溪

季冬至阿蘭部國王城南勘獄踰山涉磧往返盈旬淒然有
關塞之感焉以詩紀之

口外旅宿述懷

二月偕富治川部郎至鄂爾多斯游牧按獄途次偶成四首
秋日寄湜甫

發甯夏詠懷四首示諸子

山中作

觀釣魚圖二首

題張貞女卷

予授徒石鼓山中衰病相仍時時謝客有人投刺於門謂予
引疾非真以詩曉之因寄陳太史每田孫廣文石溪

題柳莘門松陰課子圖

柳莘門手書大字見贈兼索近稿以詩答之

寄懷福建撫軍汪稼門先生

石鼓山中卽事二首

聞孫白沙先生南歸喜而有賦因寄石溪廣文

予舊有佳筆數枝頃從行篋檢出鋒穎半落矣詩二首

題田鐵舟太守署中菊花六首

江南曲二首

錢武肅王鐵卷歌爲錢氏裔孫某賦

題李鶴坪明府江亭貯月圖

首秋登南嶽祝融峯述懷

題韓鑑湖少室淩松小照

題徐香莊畫梅詩卷八首

送廉訪秦小峴先生還無錫

杪秋寄懷秦小峴廉訪二律

留別史生調梅四首

重登峴山作二首

予所乘馬齒長矣邇聞人從平羅市蕃馬歸充補驛額擇其一備乘以詩紀之

詠懷二首示弟湜甫

王蓬心司馬洞庭落木圖爲劉茶川賦

爲幕賓母題真

上紀觀察四首

壽李明府四首

壽黃太母七十

落葉十首

得歸根二字

詠志五古二首

題鄭節母卷

贈嚴訪清公五百字

遣興八首

卷三

匡衡論

莊子材不材之閒論

陶桓公論

衡郡校士錄序

畢莘農咏史詩序

嚶鳴小草序

周氏族譜序

湘陰任氏族譜序

送觀察梁冲泉先生遷廣東臬司序

送廉使秦小峴先生還吳序

送衡永觀察史公柘溪入覲序

送孫石溪遷潛江教諭序

馮虛齋先生友古堂詩序

應封君七十雙壽序

封君韓旭亭先生七十壽序

懷麓李君七十壽序

辨誣論書後

郴州刺史應君未堂條陳剿匪事宜書後

卷四

上汪方伯稼門先生書

復廉訪秦小峴先生書

再復秦小峴先生書

復廉訪秦小峴先生書

與某書

晉贈朝議大夫李公曉齋墓誌銘

五賢祠記

甯夏重修文廟記

衡州新建文昌魁星樓記

遊衡山祝融峯記

鄭節母傳

槐塘先生傳

傅貞女傳

黃越生傳

先府君太孺人行述

安愚齋集卷一

湘陰周錫溥

詠史八首

卜子居河西文侯親北面大哉鄒魯風胡此衰周運
段干亦坏邇苟無希世姿何恥踞堂見秦妝嗟倚市和璞泣三獻
後代無師儒呈身作溫卷

建元盛制作虛名採文儒早聞枚生賢卻枉蒲輪車梁苑無遺老
垂詢以欬歎長卿方蠖屈天子善子虛曩憾不同時同時復何如
折軸由叢輕斷統非木鋸嗟哉螳斧後已有黃雀顧漢治數文景
家令工計數寢廟鑿堦垣丞相爲隕仆豈知晁氏危竟以智囊誤
察淵非我祥薰社招神怒昔轍今所哀今人轍如故

許侯椒房親去天不盈咫故劍藉殊恩衛霍已前死東第開長安

鶴蓋紛填委次公仰屋悲後至最先起云此如傳舍閱人亦多矣
是時鄠杜間狂名滿人耳

我愛鄭次卿持竿不肯投我愛蔣生徑相過惟羊求道非纁帛貴
名與山川留母以漆室女而懷魯國憂母以堯舜時而賤巢與由
阿公東渡河追鋒不施幔趣付黃羅衣官車出已晏如何豚犬輩
但戀驚馬棧義爽既參夷誕欽空首難時維豪傑盡炎鼎不終判
方將討伐功自許天人贊神叢假不還奕棋置轉幻軍中青雞讖
道上兜鈴喚失國何足傷傷茲弋者纂阿瞞自嚙矢收后如轉盼
丁零盜牛羊往獄可并桀丈夫生扁落逐鹿說秦漢阮生故途窮
聊興廣武歎

晉世有大人孫登特高妙吞吐天地丹發爲鸞鳳嘯蘇門敞雲榭
可望不可到寶玉韞深山豈希一時耀

逸少起郎署性非耽隱淪靈鳳被文質舒卷由天真累賤止北伐
朝議方紛紜用之安江左違之會時屯誓墓爲懷祖卜宅依許詢
翻令謝安石回首東山雲

後詠史七首

往者羣鹿逸七雄起相持志士恥帝秦高義凜鬚眉洹水盟不固
惜哉若連雞維時六國中地猶五倍奇衡人事虛構因弱以致危
祖龍襲餘燄長距從指揮方矜詐力是豈計首功非馳道極燕趙
萬松隱金椎複閣西屬雍初以名王姬宮車碾飛電神鬼相驚疑
盡燔百家言寫鏤嶧首碑思示萬萬古功高德巍巍

漢祖歸未央四顧盡高鳥辟穀託幽閼採芝成綺皓陸生說詩書
馬上爲傾倒尉佗旣蛾伏橐中載瑰寶歸買好時田貽子得稍稍
趙舞揚戍削秦歌窮要眇極樂十日更供帳盡鮮薨三萬六千日

優游以忘老

交河春草碧單于旋幕北秋高蕃馬肥單于幕南移狐兔獵不足
弦聲控三垂伊昔長城塹秦人億萬糜賦粟三十鍾僅致一石資
謫戍起閭左飛芻盡黃腫耕夫不供饑紅女不足帷通川周虎落
夜雪天如窺馬嘶溪水鹵人裹金瘡瘼候騎每到雍軍書頻刺閨
咨嗟灞上戲感愴平城圍當時怨武皇窮兵禪姑衍不到狼居胥
烏知王庭遠

祭酒老布衣燕領飛食肉誓令九譯請不事一毫禿西羌敝中國
何止鳴君轂公身懸敵間制變始神速威行信乃明疾機掩奔鹿
喋血康居庭通道月支谷過師若枕席假節安反覆侍子花氍毹
離宮青苜蓿近縣罷防秋大農稀轉穀風沙歲月深濛汜光景促
龍髯攀屢墮雁臣朝不數暫兄旣陳夢阿妹如畫燭身綰通侯印

淚落涼州曲生望玉門關華髮何由綠

步出洛城東佳人小垂手陽阿曲未終白日已向酉馳車不掩地
百年亦何有卻笑張讓門巧宦事趨走涼州守易得底用換五斗
嗚呼古達人生前一杯酒

朱陽盛炎鼎水火始戰爭草木自矜寵氣若無秋風秋風一已至
蟋蟀最先鳴一鳴江水涸再鳴倚重局小婦理輕素步欄以淚零
豈伊一人悲念此遠戍情未寒思授衣既寒空撫膺常恐凍雲合
邊日暖無精丈夫願玉折不隨蕭艾榮遺榮固良可玉折竟何成
漢網裂中世高安起微芒藉恩輿席間人主謬所當三公禮殊絕
更云大賢良親兵取蘭錡大第倖建章如何萬歲後禪位希虞唐
禍基有先兆枝披心已傷有人假神叢五日如枯桑

送弟湜甫之永順

君今此去錦江西子亦迢迢共五溪雙槩乍分千嶂合四山秋雨
夜猿啼

沅水東邊古夜郎詞人舊事已滄桑君行若問今風土可有居民
賽竹王

之漱浦作

邊沙吹面苦檣纒尚有楊花爲拂堤笛裏西風無鳥度舟中秋雨
一猿啼天光入峽看疑甕石路穿雲覺有梯大酉山前迴首處謝
家詩草昔曾攜

漱浦竹枝詞八首

小姑團花金鳳裝大姑針鎖聲琅璫相約鳳凰坡上去斂身齊拜
頓仙娘

蠻花溪上放春晴蠻女垂肩銀作纓纓絡滿身花裏過照儂顏色

十分明

紅楯當門十字排，蠻歌邠笛響相催。
絙幡招飈罡風起，知是神巫捉鬼來。

百子銀環雙髻丫，清明三月好芳華。
卻看桃李無顏色，簪得牆東地子花。

盧峯洞府多仙人，乞雨歸來雲滿身。
五月巖龍驚不起，洞中惟有七娘神。

蕎花天氣曉相和，好會人家說打鷺。
只待年年鷺掌大，大家牛飲醵錢多。

江口西風古驛寒，送郎時節蜜花殘。
扁舟一去如飛箭，知在辰河第幾灘。

冬青幾樹白如霜，又見枝頭蠟子長。
簪葉裹身齊上樹，不須春雨

事鱸桑

夷陵覽古泝黃牛峽口迴船作歌

蜀棧峩峩不到天大江爲戶山爲鍵
硨磲下峽數百里勢與元氣爭
吐吞夷陵古戍鎖紐壯九龍酣戰開藩垣
循崖遣載行牒子嬰駕赤鯉驂元龜
邈邈上黃牛三朝三暮牛依然山之縱橫
婉孌不可以意度上有神鬼騰踔空明閒
離堆壘後無巨手至今此地多哀猿
昔者陸鎮軍云是吳西門步闡故營
偃殘月想見鳳凰天墮年阿童小子真
戲劇鷁首聚怪驚夔續三山徑造節迎刃
坐令精鐵一炬隨飛鉛陋哉建平守抗疏
增守屯武安事往同一呬不見野燒畱秦
痕李流孟昶競牙爪犄角祇爲賢者先
我記昭邱來賽江訊筵尊是時風雪暗如
海符簷掀簌無穩眠今來慣見頗覺心眼
快安得劃水逕渡如飛仙歐陽南遷一夢
到長慶舊碣三人鐫

興酣捩柁喬木杪星月下瀨烏尾懸水村山驛白浩浩兩膝高踏
風輪旋呼童取具軟腳酒試將芥蒂爲洗湔下簾支枕清睡足朝
曦已破荆門煙

送弟湜甫之均州次劉茶川韻

客蹤流落似萍花太息吾生豈有涯此去看雲還念爾可能見月
不思家漢南柳色三眠盡均口西風一棹斜買取宜城新醞好中
宵津鼓破寒嗟

登黃鶴樓

雲篆丹鑪劫火沈尙餘樓閣此憑臨乾坤潏潏浮江漢城郭纍纍
闔古今幾處布帆催曉發四山涼雨作秋深嗟予家住瀟湘浦只
隔湖雲一片陰

黃鶴樓小飲至暮

青梅作弄晚鴻前。碧玉枝輕手帶煙。水闊荆吳供遠眺。夜寒星斗入高眠。同渠一醉樽中海。從我忘機地上仙。且欲扣舷江北路。風清月朗不論錢。

荊州送孫石溪南歸

廿載聲相和。有如輪著輞。爾來走天涯。兀兀困塵鞅。浮萍不自整。汗漫吾安放。昨歲君北行。消息傳髣髴。倉皇失把袂。尺步杳尋丈。目斷邊鴻飛。傳翼不能兩。冬杪得書問。欣幸逾束紡。上言久風塵。燕趙餘慨慷。下言隨幕僚。約我同蓮幌。獻歲採湘蘿。經旬躡巴蟬。相逢各迢然。掬喜到眉顙。袴褶君信佳。芒鞋我差強。沈牛賽江深。請佩睇漢廣。臨風感橫槊。覽古嗟稅杖。竭來荆郢暮。瞥見霜雪爽。數起循刀環。具知理烏榜。此去慕歸休。發機真勇往。巡簷鵲聲噪。候門人語響。洲白可誅茆。山青聊拾橡。坐膝置文度。畫眉頰張敞。

稻香雪翻匙酒熟雲滄益耐可供著書屋梁時一仰晴余叵故歡
瘠馬立殘仗思家旣迢迢念子亦養養底須三語掾要乞五湖長
阮土憐東平杜亭卜西瀼千奴緡可算二仲駕相枉綠傳獵時講
紅拋醉中網樹木須十年蠟屐能幾緡對此終茫茫何由慰遐想
赤壁夜泊

漬得寒煙作晚炊渡頭官柳不勝垂賦詩橫槩非吾事對酒當歌
要此時夜月江空飛鵲迴西風秋老片帆遲坐中亦有吹簫客莫
遣嗚嗚感鬢絲

古意

綠蕖發方池趺蓋相虧蔽下有千歲藕玲瓏託根蒂朱明耀丹房
願言采其實實成薦君盤不比花時媚物理驕新寵苦樂信所寄
持將比妾心未剖中有意

發襄陽

銅鞮坊門夜不扃
簪車銜尾鱗
風鈴市兒自勸
宜城醞
客心先發
桃林亭
桃林飛花著楊柳
柳老綿薄俱飄零
飄零不繫紫游絳
盪爲宛轉波中萍
九衢塵高我行晏
古錦一束隨僮丁
纜絲解風柝
弩疾藻劍刺水蛟
涎腥劇憐峴首不忍別
懸崖綠淨玻璃屏
漢皋一曲展幽盼
明珠三五何娉婷
微波未託淚
盈把坐令局促噉江
靈臨風回首浩三歎
吾以二月揚帆舲
冰漸初解河腹凍
草色記泝裙腰青
睢漳南注見鎖紐
袞斜西望通渭涇
長筴牽挽緣斷轡
雲合不辨來何經
卻從去後想遊歷
夢迴山水餘清冷
興酣起捉如意舞
百年有若物
寄瓶夕陽天外荆口
成指點行色雙鴉翎

望紫霄峯作

仙宮霧雨春冥冥
電影欲掣雷車轟
眞武眞人玉蕤纓
空中丹劍

鏗有聲手綰神圖太乙經攝御百怪祛三彭空山枸杞夜吠鳴不
但河車之紫英我來均口眺崢嶸三十六巖青繞城望不能至心
歎驚少時學道已粗成偶然積夢通廣庭羣官召草新宮銘綺語
未盡千劫更忽忽一墮隨飛星試將尺宅理榛荆伐毛一洗凡骨
腥問神何由息我黥舉酒一酌青山青

武昌幕中與素人師論文作

斯文厯千劫耿如無盡鐙典彝肇姚姒流別沿歐曾遞變爲制義
嚆矢推成宏後來更提唱星日交環縵歸唐最初祖天翻謝飛鱗
金陳理繁富積氣摩鯢鵬諸家各旗鼓峰距何峻嶒是時面壁士
或不隨召徵息踵向枯木正色鋤所矜白社三數公碧眼如秋鷹
空中索曹謝味外分涓澠遂令九軌道劃若齊鉤繩元風一已遠
此散如廣陵漚穿蒼石破蟻穴九仞崩孟公誤驚座唐衢或沾膺

廣眉與半額一笑輕束綾目爲時世妝訛謬相因仍愚子棄衣珠
黠兒黠緘滕芻狗陳一旦銅蛙亂千塍卻觀竟何有層涸不受罾
於惟作者堂欄檐何由登嗟余識藪啟廿載湘山層凡鉛鍊丹汞
攫步思飛昇終慚一宿覺空復三折肱但餘兩敗簏細字棲凍蠅
如何見蘇採猥以介友朋此道如禪悅聞說那可勝畫佛本非佛
覩此圓光騰使者古元度朗月涵秋澄聞語爲印可知已了三乘
里耳晒皇琴夏蟲疑清冰亮非上池水誰洞五藏藏竹樹交瑣院
絮雲起微蒸坐閱恆河沙欲掬無斗升吾儕事點勘能無感廢興
長恐一曲誤拜起嘲謔丞耳熱爲此歌結習不自懲起看珠斗墮
屋角垂寒稜

陪素人夫子與諸同人泛舟西陵峽訪三遊洞四首

江干曉色捲雙旌裊裊煙林到水清嶺樹幾行分楚塞朝雲一片

出巫城偶同樵響隨松住擬待人稀坐月明看取石泉如鏡影便
應煮茗話三生

片雲深處隱玲瓏幽賞惟應我輩同入峽乍疑凌莽泐探奇兼可
問鴻濛巖空玉女窗前月木落仙人掌上風碑字數行多漫滅剩
看坡老與涪翁

攬勝全憑屐齒幽平生落落數交遊幾編詩草懷長慶無數啼猿
繞峽州十二碕邊雲對影下牢關外雨迴舟籃輿載酒天涯客一
片青山萬古愁

蕭蕭軒檻倚長松欹枕能添午夢濃石氣溟濛三峽雨仙臺清迴
萬山鐘白雲樽酒誰相共元鼎丹砂不易逢他日歸田知有意隨
公九節訪茅龍

梁冲泉先生新任鄂藩予時在武昌學使幕將南歸匆匆謁

於旅次感受知之既久傷歧路之多違臨別贈詩用申積
悵云爾

十載清湘遺愛存重來人見使星尊此邦江漢提南紀從古荆襄
重大藩夜月樓臺諸部掾西門楊柳萬家邨平生好事元亭客羸
馬匆匆載酒樽

鈴閣香清署鼓殘梁園回首別應難天涯有淚揮歧路江水無情
隔一竿黃雀雨昏孤棹晚神鴉風起白波寒符窗後夜推篷處北
斗迢迢獨倚欄

遣興 時客武昌

長笛吹殘鬢有絲十年疏影漢南枝酒醒峽口聞猿處秋老黃州
夢鶴時細雨始知江路永西風不覺客帆遲次山亭畔寒谿近便
擬拈椎問導師

寄懷梁冲泉先生

少無二頃田牙籌自持絜長愧洛陽賈心計工鹽鐵幅巾三十年
望古殊兀兀羹飯引昌陽刀圭可怡悅苦乘薄竿車奔走事齟齬
詎云躡朝景亮以垂寒咽夫子世韋平橐管隨朝謁採訪來湘東
張弛妙無闕墨灑衡山雲風流盛提挈危言上所啟一語善醜蔑
講舍開精廬令得習綿蕝末學終望崖短衣聊拂闌太息湖上行
倘悅爲此別是維星孟陬堅冰破寒厥瞻拜下毬門絜帽披晴雪
西門夏施柳旖旎可攀掇百花金井闌漸及熟桃核常恐寸草心
宛轉驚鴟鵂比聞六乘傳奉詔馳南粵銅柱懸斗杓蠻蠻望旌蜺
遙知新城埽祖帳多期盡我乃如長竿束急不得掣豈爲兒女仁
奮飛感所切慚無廈誦器盤錯試根節書檄念依劉病聲苦兼越
樊口交屣屢支祁互出沒沈吟暮回首浪對江山絕有如逃虛谷

蛩然想空闊邇來值歲飢蒸芼及藜蕨家書時一來心悸愁手折
長笑東海臣斗水乞車轍頗似漢丈人抱甕徒捐捐緬懷舊時事
悽悽如轉轡歧路臨大行望遠可嗟咄何當訂其頑兩端爲我竭

洞庭舟次

洞庭歸櫂起神鴉稍喜湘山望有涯落木始波妨細雨片帆秋影
帶孤霞蘆肥洲渚漁成市橘足鄉園酒易賒明聽北風人喚渡一
灣清淺是長沙

舟中口號

養鴨閑邊雨洗塵手持樽酒賽湖神江風下水須看客關月中宵
始近人薄暑未拋團扇白輕寒初展袂衣新湘鬢十二雲旗迴輪
與鞭鸞自在身

湖上散步夜歸過南泉寺

黃雲香盡稻花塍
隱隱吳歌罷采菱
殘葉有聲天宇寂
落鴻無際晚波澄
葦煙深岸藏漁艇
人語疏林散獵鐘
早是上方鐘定後
右肩偏袒問南能

竟陵同劉茶川南歸舟中話別

竟陵西下敝裘單
歸路同君別轉難
江上暮愁山幾疊
天邊雲影歲將殘
孤帆風急隨湘轉
白雪風高入郢寒
把酒若爲商去住
愧無長策理漁竿

旅泊

雙槩經年問水程
漢南回首舊經行
幾株風柳兼殘雪
隨處飄雪似我情

極浦荒寒雁叫羣
霜刀剪水夜初分
孤篷晚泊知何處
敲枕江聲不可聞

樊口送人作

吾宗天機深質幹秉脩潔昨來樊口遊共醉南樓月橫江歌管金
屈后談天坐客多心知米價問君君不語我信王掾非真癡人生
六鑿苦顛倒安得如君守枯槁卽今憔悴客中還西風江上愁關
山他日學道能追從與君一訪河上翁

示家人

去歲東南乾十室九未穫平生百本書不直一藜藿踉蹌出門去
輒作數日惡積食兩譏車返哺亮已薄稍喜今年來元氣起羸弱
歸餘埽門徑如水得返壑親老餘牢匱兒嬉弄餅飴昨宵醉頭雨
融液如酥酪安排話團圞莫令感飄泊冬鼎爾能供春鳩我可耀
未須萬錢廚但要一餉樂行當出餘裝待明理蠶箔示君應大笑
複禪儻可著

詠史三首

東田陪輦半詞臣邸第宏開竝紫宸楊叛一聲歌舞散沾衣惟有
故宮人

丈夫偏作褚淵生賸有西風滿石城記否高軒彈別鶴一秋風景
故人情

十萬樓船白水津野豬酣戰未亡陳君看他日田橫島尙有悲歌
五百人

黃梅雨

銀屏曉氣溼煙煤夢裏鳴鳩喚幾回二十四番花信過一簾疏雨
熟黃梅

故人新雨望徘徊曾記名花驛使來飛絮滿城春草碧此情誰似
賀方回

擬古

蘭露被漢皋豔此春陽女纖手摘明珠羅袂從風舉芳華易惆悵
歧路懷交甫微詞請我佩將以申綢繆感茲高義陳爲君久延伫
精心託微物不在陳歌舞彼美日以遠朝華能幾許願言崇明德
百年以相與

李彩邦自都中歸得弟湜甫手書并聞劉茶川凶計

京國多年別西風一紙書弟兄流落後朋友死生餘暮色浮金井
秋容淡玉除因君問消息愁絕幾沾裾

吾弟春前別經今聽暮笳五陵裘馬地貰酒向誰家二尺孤檠短
三千簡牘賒好從唐舉相富貴幾年華

邨居納涼

雌霓挂新雨招涼滄海東瓜郭浮夏綠榴實裂春紅酒古塞通月

簾疏暑颺風角巾無一事揀字課兒童

十畝青溪畔當時耕鑿深黃雲割秋色金井落商音藤角從支枕
荷花不滿襟乾坤容一笑老著故山林

題戴尉荷露烹茶圖

先生老作淶江尉有如東野居溧陽官曹但飲一杯水手板拄頰
凌青蒼濯枝雨過天氣涼卻辦布襪隨奚囊是時綠荷大如掌波
紋斂濫瑩方塘科頭箕踞踞澗石花氣似欲侵衣裳呼童瀉露供
茗事玉碗一勺琉璃光興酣圖畫煩好手點綴尺素如琳琅吾聞
昔人把金錠品茶隲水皆精良竟陵著書亦癡絕強將泉眼分低
昂百年風物劇漏箭誰能芒鞋谷底尋康王曇濟道人選佛場八
公仙醴凝清霜偶持餉客共驚詫此味豈有人間藏覽君斯圖毋
乃是坐覺齒頰流餘香我生潦倒百無用五千文字空堆牀邇來

微陰語苦澀猝然有得心已忘下簾支枕自歎息安得灌頂如瓊漿徑須從君乞一瓊蕭齋臥聽溪風長

秋荷

日暮暝煙生古渡天清明月浩江波芙蓉老盡愁如許欲寄相思柰晚何

失題五首

鵝黃低拂雨如絲少女風微漾鬢絲三徑垂楊飛細雪方牀六尺坐吟詩

遠水鱗鱗綠欲迷夕陽遙與尺帆齊幾番夜雨春江夢風動槐龍杜宇嘯

百棹航船藉解愁傷春無異古傷秋何當元石三年夢一醉中山白玉鉤

滿院桃花照眼明一窗風雨撲簾旌武陵人世仙源在湘水湘山
萬古情

尋芳山徑草萋迷萬樹松杉撲面齊幾度道鄉臺上望夕陽山裏
鷓鴣呢

三弟雨蒼亡八年矣承方亭五丈許爲立傳賦詩二百五十
字以道意

少時鴻雁行纍纍一家慶持將寸草暉植此嘉樹竝三弟我叔慈
在座珠玉映伯仁非鳳德不待投蠟競憶昔麓山遊屬有稿紵贈
雞壇盟長衛駒齒班後鄭君時遙語我法護最清令詩憐走馬成
色鑿苦李淨方將騰上速豈意摧折橫終軍纔弱冠衛玠蚤羸病
念我空餘生不得代子敬從茲幾春夏萬事輕墮甌蕭條狐狸穴
淒絕風雨聽芸甍時一啟跡若手新塋蠶牋十樣殘古錦一囊賸

長恐就埋沒編刻心未竟惟君素鍾情眼底閱衰盛尺波悵東瀉
銅山撼西應昨來屢綢繆感歎淚交迸史稱閭巷士驥尾託後乘
成毀古有數風流爾何罄願因君集中磊落見名姓無忘青簡惠
慰此北風勁膏鐙照泉下我弟亦蘇醒因歌代短書激楚不成詠
秋柳

細縷芳煙化作萍相看無復舊青青樽前誰唱屯田曲殘月西風
不忍聽

詠史

五利文成竟伏誅人間何處有蓬壺君王卻起蜚廉觀祠具紛紛
用越巫

途中別友

邨鷄裊殘聲羣飛開如霧依倚風露間夙裝爲我具遙指灘江流

峭帆從此去關月酒醒時相思兩無處

萱草

朝樹忘憂草夕佩不愁木愁亦不可銷憂亦不可卻何況百年間
渾沌自相鑿一身爲漏卮尾閭洩溝壑紛紛鑪鼎間何從候朱雀
古之列仙儒內外皆撻鑰背滅可休生養命有中藥

送張子歸益陽

溝水一朝別不知東復西念子三載闊復此同羈栖驚蓬引回颺
零落還相依各有晨昏戀淚墮浮雲滋願言攬子袂解棹及秋時
秋思淒以冽我行轉遲遲子亦搔首歎獨往無招攜強欲畱待我
其如屢愆期周周銜羽飛燕燕影差池匪伊物足感悵別情在茲
捧土塞東流定非身所支爲君作短歌短歌清且悲他時樽酒夕
拊膺當爲誰

送友人之官河北

都門柳棉吹柘黃短歌贊醉紛千觴別來林臥踰一紀舊遊如夢
心慨慷故人衮衮半華轂君亦補吏腰銅章雙鳧北望劇分喜以
手加額眉飛揚昨者暫遇郡城閣知君休假緣終喪夜深咻匠肝
膈熱傾談覩縷髯戟張大府起君牒旁午邊馬躩蹠仍西疆曉日
三川望滎澤盤車九折臨太行此邦參墟俗且厚九宗著姓古冀
方當時尹鐸首爲邑增壘損戶眞木強城垣三版浸不沒豈藉絲
粟爲金湯廉頗虎威思用趙沙陀鷁隊功存唐固知好義有天性
醕風一綫今堯鄉盛朝禮樂軼寶鼎軍道無復循定襄弦歌
自是儒吏事何但勸課敦農桑君前潞河有成效力崇令德期勿
忘挽船未遑折崔朴賜絹曾見褒李章他時我亦躡曉鼓儻得秋
浦鄰河陽贈言譽譽慰行色汾雁已趁西風翔

送別

樽酒送君別候蟲天已秋華鏡照客鬢對影成蕭颯夜分起裝束
曉星猶在樓子來無幾時子去誰與儔雖得展良覯有如聚萍漚
幽心正斷絕玉笛慚以柔我旣不得行又不能子畱挂帆落霞外
孤影搖輕鷗雲深湘浦白水闊蒼梧浮臨風我坐歎獨寤君始愁
薄寒弄餘峭餐寢慎自謀緬惟聞居約使我長悠悠

壽鄆方亭六十

我昔杖策麓山阿蒼煙萬仞凌嵯峨皇娥拊瑟山鬼嘯輕舸下剪
瀟湘波雞壇落落才者七繡螭陷陣如鵲鷺孔融過二公始滿正
平幼少肩相摩當年意氣百不磨願得相依同蒿蘿頽陽西下水
東逝杳如珠散風中荷平生碌碌何萬事拙樸具作佩隨蹇羸吳關
楚水奮蹴踏只似拙燕無常窠索米未免侏儒笑濫竽終遣侯門

詞羨公早歲謝時譽樹瓠之鄉乃無何滎陽山中柴礪羸但有斜
逕通碾渦遺音闇淡追正始古篆詰屈摹光和誌銘斑駁體尤妙
崇執圭邱陳轡犧異時縱觀已縮手况乃十載成蹊跼城南逢公
傾兩蓋學道轉肥頭不僭語酣示我近時筆似去鄭濫聞雅歌華
筵今開第六秩食肉健飯如廉頗從茲編刻到耆艾發篋須汗數
橐駝更聞結習了三昧趺坐自可愈百痼入水光明定怖鴿六時
梵樂教頻伽微生如塵墮曠劫頗藉妙義清心魔便寄此篇爲印
可直恐一粒量恆河明乘春漲相問訊試將偈語參東坡

邨夜

鄰里猶聞夜作聲月中人語幾人行披衣四野露初上彈指西風
秋欲生院靜燐螢開闔影邨深鷺鴨短長更垂垂南畝鴉黃色眼
見甌窶早晚成

春日登雨花臺晚眺

生公說法此高臺春日攜筇埽碧苔
野鳥自依空外語山花都向
定中開下方城郭明殘照古寺松楸老劫灰壞遺碑憑眺盡更
看暝色隔溪來

予將以謁選入都訪鄢五丈方亭於淶陽山中泊晚畱宿敘
別言懷值其誕辰並致稱願之詞云爾

塵旄附驥強飛鷲曾有嚴詩入杜編
載酒重經安石渚幾時同買
廣陵田友朋傷別中年事風雨前期一夜眠更值弧南開
眉分喜到賓筵

射策談經術已疏十年隨牒遠方居
吾行會及鷺花好此去榮沾
升斗餘元結一官真浪漫達夫身世本樵漁
他時望氣君將隱少
假從容著一書

都中贈別長沙太守

長沙送公城北隅春風花雨隨行車當時牽挽惜日晡豈知別垂
十載餘洞庭瀟湘眇愁予以手加額瞻斗樞天旋如磨蟻故迂戴
盆之望誠區區揭來捧檄遊上都逢公謁 帝承明廬鬢髭如昔
顏不癯爲余五馬立踟躕中秋月華臨九衢瓊樓貝闕環高居城
平風裊漏滴壺天街問字摹清虛良宵易得此會無羨公屢牧州
上腴治平第一河南吳行伏熊軾輜兩朱雅歌緩帶分闔謨地下
蟣虱臣藐諸一邑竚待朝命除上官板召吏索逋書生結習遭擢
揄因人卻恐圓波觚得公一言反我愚不須歧路霑衣襦

安愚齋集卷二

湘陰周錫溥半帆著

之官甯夏作

去作秦關吏行隨塞馬蹄天街分昴北地紀入河西鉛槧猶堪把
鸞鳳不礙栖到時邊草色應及晚春齊

聞道沿河戍經流跡未淹儲邊策虞詡繕塞憶蒙恬井稅渠官重
山行鄆尉兼徵徭吾敢貰聊欲霽威嚴

次韻孫五石溪見寄之官甯朔之作

邊邑臥無事清琴聊一揮秋高乘鄆出春晚上河歸野色三城古
軍書五道稀承流宜虎節不假折膠威

君問新秦部腥塵互晦冥河焚三空綠渠柳數條青苑馬通蕃牧
旃裘拜漢庭故應逋客遠移檄草堂靈

次聯一作行廚供楚白官
隋入焚青三聯一作折柳

蓬草篇

己酉六月予自蘭州循中衛回甯通接府檄委勘香山雪
災山在衛城南八十里而至災所幾百里涉大磧薄暮始
至人馬饑罷出錢易粟芻不得詢之居民則山中故食蓬
草也持示予有沙蓬水蓬綿蓬三種其法入水一沸漉出
之別入水熟以爲羹充日夕餐具多則乾以禦冬予乃知
邊塞間民竟有啖草爲生者命烹以進則腥澀幾不能下
咽而山民終年食此可歎也按蓬卽蒿類見於毛詩爾雅
傳記諸書三蓬卽三種蒿也蒿類如莪蓂耶蒿味甘氣香
者可摘以供蔬然非常食又如博物志所稱一種蓬草子
作飯無異秔米儉歲可接糧而香山民所食之蓬草皆取

根葉茹之未聞有子如稊米也與博物志所記美惡迥別
又今甯郡近河諸堡無此草名稱志亦不載或當年地利
猶厚山民未盡食此抑其地僻遠非採風所及耶予因勘
災目擊斯異以爲雨雹天之常沴而茹草人之奇厄迴車
感愴而韻之名曰蓬草篇用補風土之缺並告其令胡君
息齋俾加振焉亦無可如何之極思也

金城歸來寒始退凌晨飛騎至中衛衛東半壁繞邊牆香山卻出
邊牆背炎風五月雹如雷捧檄行勘香山災路窮崖斷百里許始
見屋角烘煙煤居民迎謁舞相屬我僕已痛車卻軸呼令換米充
一餐山中食草不食粟夜深月黑人奔波太息柰此官供何口道
草名手摩挲逡巡予側那忍訶一種頭垂如羽葆名曰沙蓬出沙
杪一種微窪谷下苗厥名水蓬類萑蒿沙衝水漲蓬生少水激沙

穿蓬見高別有綿蓬葉爪碧入夏軟現兜羅色青裙小婦淪殘冰
三種齋烹待官擇土氣苦腥味苦澀舌本間強嚼不得推案置之
長太息問民啖此經幾秋豈無五種田可緩民言甯夏河爲塞此
山巉嶮懸河外禹時棄地秦時壕偶有人居雜魑魅枯暑戰霜陰
氣涸重霾軋露陽施閉舍南老翁面凍梨知春不知楊柳稊病思
清井澆肺渴雪盡卻飲沙中泥先時父祖營耕壟萬畝斷山山脈
動短苗茁冰花開又報沙蟲大如蛹官耕委棄如土苴子孫啖
草爲生涯草少人多日一啜饑腸宛轉鳴縶車昨尋薦地西山麓
收放牛羊盼年熟胃可充食皮可衣贏得餘資作稔粥雹災瞥過
旋成空牧場死骨撐青紅老鴉惡鳴飽狼籍五更往往啼腥風東
家西家淚沾灑回看蓬草陸獨在謝天再拜乞天慈但願蕪蕪得
長採我聞此語感且吁大哉天地何事無記我南中歲無恙廩圉

遮迥如屏障市橋豚酒滿眼酤老饕未饜猶惆悵自從作吏來邊
關邊黎照眼饑羸癡年年濬渠漑河堡渠水不到成河灘巡稍放
閘訖無暇赤手那補地角剝每聞流亡夜輾轉忍竭膏血營炮燭
豈知香山近咫尺性命乃有懸草菅人生九土共覆載不著食籍
良可歎行告爾主發陳廩漏澤一綫回天慳語闌攜槩疏所記客
次蕭颺北風厲莫怪我詩多苦聲請官嘗此三蓬羹

仲秋河上邊風乍起仰視飛雁如雲從西北來渡河南翔至
夕不絕感賦此篇

雁門太守食雁多東曠磬石西張羅邊霜八月委蘆草銜呼一一
飛渡河河風卷沙無住腳前隊隨陽後儼漠南雲行斷碧天高老
我荒山白翎鵲

承天寺西夏斷碑歌

藝祖首除藩鎮強虎符合豹中樞藏降王爭執仗下梃遭寇未下
河西羌夏州保忠族內附繼遷假息招叛亡地不過漢一大郡折
箠笞之如犬羊誰遣輿瓢自剖裂坐使神器成敝黻獨能二百六
十載鼎峙夷夏爲雄方先時鬼理慕華俗窄衣野戰歌慨懷文思
起草學士院元卒署字藩臣章九經旣頒科目建頗革鴟響墓鸞
鳳春秋飯人例不舉左右記注無賢良至今草木盡頑獷遮迥但
見黃雲長承天蘭若亦傾圯有石斑駁螭首僵圖書灰滅此獨在
有似任休登明堂惜哉神靈失呵護剝落不足榻硬黃向來郡志
已訛闕何況經今數十霜攤書布席就讐校強測駟駐推偏旁一
碑天祐十數字攝提歲月俱渺茫一碑天慶刊者半撰記略識羊
與張銀棺舍利瘞幽閼令我循誦生感愴百年殺人若糜沸八功
德水誰乞將然猶以此誇種落稱壽母后諛今皇南渡宋亦小朝

耳山河牛角汴入杭獨畱一碑笑千古元祐黨籍書奸猖伊川披
髮有先兆儒墨異術同糝糠國家有道四夷守文字要以扶人綱
如此斷跌何足惜覽古一嘯西風長

巡視渠工二首

清明渠上草蒙茸荷畚填薪萬指同官吏行春復行水乘船騎馬
雨愔愔

三旬橐鼓閱春寒粒粒艱辛輟曉餐我與齊民共區宇巡行休作
貴人看

青銅峽三首

牛首山高控上游賀蘭綿亘峙西陲青銅白電重重鎖卻放黃河
出塞流

峽口斜陽一半開中流濁浪走奔雷層冰觸槩堅如石知是崑崙

頂上來

風翦垂楊未放稊雨肥沙草綠初齊
牧童鞭掣黃塵起百尾奔羊似馬蹏

塞上絕句十四首

榆塞西風捲地鳴單于夜獵控弦聲
軍中荳火如星列傳矢三更盡上城

梁楚功臣一劍除空餘屠狗佐皇儲
平城曾下閼氏拜誰與娥姁雪嫵書

單于臺畔弭魚旃尺一遙憑使者傳
十八萬軍宣武節漢家天子自臨邊

漢家使者大宛還天馬蒲梢汗血殷
路涉流沙萬餘里幾人生入玉門關

黃沙爲塞海爲壕一綫飛泉出寶刀秦隴西來無地脈只緣城塹起臨洮

槍纍大幟擁毳毼彩帳蟠螭首霞傳得秦王破陣樂主賓開宴向高牙

寇壘山前一戰摧解圍誰似霍公才琵琶妙伎佳人舞娘子軍中教陣來

狼頭大纛掃欃槍雪恥花門起朔方膜拜馬前安葉護論功誰似廣平王

匆匆戰鼓震平涼誰遣要盟狎虎狼榆柳蘭州焚伐盡他時父老泣先皇

金城貴主鳳爲鄉湯沐池開九曲長一片虹梁浮水上單于歌吹入青唐

懸崖一點棧中雲渭涘秦川對掌紋共道水從山下別不知人向隴頭分

虎落分防塞下秋冰堅又戍海西頭西風吹灑三河淚竝入寒漸不肯流

黃雲捲盡出星河罽粟城頭夜按歌一種居延海西月清輝不似漢關多

蓬婆雪嶺鬱屏顏馬上西風送雁還不信金閨千里夢等閒隨月度蕭關

衙退口占二首

不向明時理釣竿三年影組塞雲端屯田古亦關軍實邊粟今猶仰縣官煙火幾家希舊井徵書五府急飛翰晚衙便覺西風厲還忍滿庭霜露寒

一方民聽徹天高百褶魚鱗小
兔毫敢罷催科矜撫字須知沙塞
異神皋隄繇未起溝中瘠戶版
猶攤額外逃刺史六條威望重阿
予程督寶倉曹

望賀蘭山作

四野皆深積胡爲著此山
玉關春已度積雪尙孱顏

青銅峽大禹廟二律

青銅峽口石爲扉禹穴中
開人跡稀自昔泥橈聞底績
至今雲牖闕朝暉九邊魑魅
趨金鼎玉服山龍上袞衣
正是渠工齊畚缶桃花春水
萬夫祈

陵谷遷流不可論渠搜故道
貢名存

禹貢渠搜卽今甯夏郡漢時有渠搜縣名

明禋地

有巖廊古羅拜人瞻蔽冕尊
海色西偏分大漠河聲北折
走中原寸陰千載眞堪惜勉
習勤勞報主恩

有持山谿春種圖索題上無款識玩之則吾江南農田小景也感而書此

春田劬山腴引腴旁有溪平疇一鍾水下浸五斗泥泥深草根腐
水滿新秧齊農人拖翠雲萬朵分千畦萍葉濫濫浮春鋤拍拍啼
三載朔方吏農侯與此睽凍甲有時圻不稱鍾首攜使君繁華眼
長向春風睇覩土愧無術撫景誰能題

我本山中癯有田介陘峴農言雖未習南畝足嘗踐土膏深起鑱
泉脈細通筧耕種一已畢終年飽精膳自從通籍後心跡兩違遠
旣蒙竊祿羞翻令本計舛搔首坐無悰畫本此焉展空堂微雨過
老夢晝扉偃如聞二三友訊我歸田晚早晚願豈諧得請我當返
呼兒理鄉枌莫待霜露泣

重陽日雙井道中酬楊蓉裳刺史

去年一琰茱萸酒未得相攜載鸛詎書來示我橫城詩玉塞高秋
落君手蒼黃握管色羞作佳處詎敢輕駢拇一官輭轡有底忙坐
惜鵝螯無由偶竭來捧檄有嚴程白日促夜雞催丑君時袴褶作
急裝余亦幅巾衣短後旅邸驚逢一大笑明日天涯又重九停橈
飲馬戒曉行五原塞出雙井口盤鵬壓空苦霧迸乳糲漫野腥風
走賸無玉醴發朱顏拚有黃花照衰朽多君詩思猶強豪要余射
埒分塲耦敗意未妨租賦吏豪情那乞蘇杭守披襟且作汗漫遊
明年此會應搔首

朔方懷古四首

衛霍曾經百戰來沿河四郡此先開軍從內府贏糧遠城帶秦關
遺戍回老上故庭深度幕武皇法駕一登臺朔方十策無人識始
信當年主父才

一旅提戈起叛亡赫連士馬舊稱強山河半壁分畿輔南北當時
幾帝王黑水宮深依故塞髑髏臺古向斜陽校錐丞土須臾事自
壞堅城萬里長

文皇剖土著降番舊有靈州石碣存持節屢煩神策府防秋時簡
朔方屯一朝臣主頻西顧三輔安危此北門聞說健兒身手好白
頭工部泣王孫

賀蘭山翠曉氤氲美利鹽池自古聞魏國骨驕曾作鎮夏人鐵鶴
更名軍降城未翦天驕盡炎鼎終教王氣分種諤敗亡韓范隕金
縉修好日紛紛

甯夏採風古體八首

余令朔五載矣簿領餘閒與斯民相見問勞爲之宣上
德意慰其疾苦而懲其末流亦吏職宜爾也朔治郡城故

揭郡名於篇著一方風土之會云

沙礮田

我來更吏考治賦無寸長常恐民力絀勸課違其方弭節原上村
父老相迎將舉策謂父老念爾愚不明不見古王制三耕備一荒
李悝漢趙過農政斯精詳節宣事在人有腹爾自量怪底歲比稔
猶然無蓋藏而反累守宰不得充官倉父老拜且語語多情慨慷
自言農家子鋤鑄日日忙此地多硝礮春潮凝若霜腐根不出土
嘉穀無由生又有河壩地風沙卷雷硯往往萬金產廢爲狐鹿場
黃流況屢徙拆隴如排牆君看數種田猶科見在糧其間可稼處
馬體中毫芒孤莖出蕪穢赤立凍不僵沙礮之所赦隄堰之所障
芸苧之所壅豚酒之所禳上熟畝盈石中熟六斗強最下升與豆
子本安得當腰鑣事未已吏牒紛在堂松花壓朱紐標識森成行

色色著我名云我有田莊無田自傭力有田苦膏肓典質納官緡
緡盡徵不償愧荷使君語生事終茫茫余聞搔首歎茲實古塞疆
蓐收此乘旺金饑木不穰百卉變衰落五種無精良安忍更鞭箠
乘危扼其吭喟彼好事者乃云魚米鄉斯言孰傳播重爲吾民傷
糧草稅

邊土一何瘠罷民心所矜坐視中澤鴻嗷嗷待西成西成無常熟
國賦有定名夏麥秋穀粟二荳莞與青四色分兩稅畝入斗二升
析爲子母耗芻束相因乘慶租斗加大制課尤不經人牛輓運勞
每兼百里程其餘減則地五稔裁一登差徭復叢集與田爲重輕
計彼平歲穫奚翅大半征況又科所無殘喘何能勝繭絲吏有職
按簿事敲榜米鹽綜碎密瓜蔓紛鉤縈不悉入者寡惡知取者盈
我聞前明日置屯此邊庭沿河九衛所一一習戰耕軍三屯戶七

二丁資一兵取足倚芻糧歲收算其贏地利既殫盡百役滋繁與
軍操著空籍賦額懸逃丁撤派事紛拏包貽議沸騰善哉朱笈疏
一字一撫膺自非身木石安得頑無情我朝覃天澤深仁被邊
氓蠲振若山積休養致太平小臣來吏此纔閱五歲星前春豁逋
欠今歲仍減徵巍巍覆載恩守宰親奉行時聞諸父老感泣以縱
橫

渠工稅

黃河富甯夏

諺云天下黃河富甯夏

水利天下無封畛錯如雲利盡十萬區

我朝繼唐漢增置成四渠口以引其源稍以達其餘塋以防其

逸聞以揚其緒正閘置橋閣橫貫爲中樞隄蟻有時穴河沙多積
淤春工歲歲鳩口算年年輸龍見始戒事徵之司馬符十畝三束
棄輦圓紅柳株折色又一籍稅皆準於夫期會清明節土膏始發

舒筮欵集蒼赤邪許窮朝哺程工一月畢十室而九瘡巡工爾何
人官吏清且都我亦同斯役屏營以歎歎念此數年來畚鍤萬指
俱千緡供一擲豈復論錙銖崩潑激倉卒兒婦仍啼呼積薪嗟不
屬含梗何時紆所以供役者但有瘠與癯日或不再食衣結無完
襦其間頗逃亡饑寒非彼辜古人重地利溝洫有成書利什害亦
什更迭爲乘除借問兩黃鵠反乎與覆乎不見艾山北故道今爲
墟

堡渠長

周禮置六鄉治具何其緡州閭族比鄰一一備官屬漢時鄉亭職
三老最尊宿其他斗食員頗亦資教督自從保甲行無復在齒錄
徒有負弩勞而無儋石祿官亦賤其人人亦恥其役朔方屯戍地
四塞兼水陸一堡置一長渠長爲之副厥初在得人明信堅約束

後來日流失抗敝漫成俗額缺更承充充者半貪黷堡政號殷繁
渠工亦奔轅往往徵調時花名若星簇公庭持手教寄之爲耳目
謂可制吏胥吏反緣爲壑一差蔓十家以次相魚肉卻署逃亡籍
株纍試鞭扑豈知民脂膏狼籍飽其腹邊地本疲瘡 聖恩此亭
毒採新實廩固放舊起顛仆況又委任之歛散從其出正使坐奸
贓豈足償啼哭更兼絲與粒國計關錢穀坐令百年間積逋不可
復此輩相依倚善幻如轉軸頗能知短長不省顧榮辱木摩木則
然水濟水則覆絲失絰者案弓離繫者曲微詞勿復陳比類在君
觸莫待熏灌窮始勘狐鼠獄

賣兒詞

昔聞有林回投壁負嬰孩謂此天屬者千金何爲哉乃知至性恩
不以患難乖顧惟蚩蚩輩自絕其根莖等茲毛裏愛覩以貧自媒

不見買奴婢都向甯郡來小者齒方訕大兒髮覆眉父母牽就市
相望何纍纍借問若干值一緡三歲奇婢價小復異盈盈上頭時
兒啼父不念兒去母不思但云紇干雀從爾好處飛好處定何處
此離卽長離鄉夢久應到生小魂夢迷別有市僧徒剽販轉東西
兒身已無蒂兒命當屬誰人家養兒女三五成冠笄綢繆六親誼
珍重百年期其歌有與樂其哭有與悲婚嫁而論財識者爲鄙夷
矧乃棄其身有類貨豚豨啜羹與放麀試以仁理推憶昨爲粥日
有婦老且嫠自言身有子典鬻無子遺只今一身在微命懸如絲
回頭賣兒錢撒手風雨馳溫飽能幾許不死仍苦饑未知再來否
惻獨無人攜予旣感斯語已乃喻遣之不聞殫負歷含將甘草貽
不聞烏母慈仍有反哺兒微物心尙爾爾當轉自嗤徒令桓山曲
終古爲酸嘶

兩番部

漢皇始開置徙民實新秦遂收四郡地賴此爲本根當時走白羊
依山繕城垣雖云阻一面三面垂在邊號爲隔羌胡羌胡滋蔓延
西北固饒塙種族蝗生蝥自周無上策何論漢以還棄之弱三輔
守之孤外援破完補一倣其勢無瓦全緬維前明日遺事可悲煎
套地何么膺穴此井底天東馳逼環慶西突連罕并此間大河險
蹂躪爲通津莽蜂起肘腋掩兔不及奔時聞出賀蘭殺人潛草間
已復入邨保搜牢無一存爾時疆場吏豈無汗馬勦理國如理絲
哀哉值其勞我朝大一統封域極廣輪自克噶爾丹已滅河朔
屯蒙鄂謂蒙古鄂爾多斯兩番部內屬爲世臣轉借彼死力爲我除荆榛
迄今百許歲膜拜奉一尊平靈數口道明制表閭門詔許通
互市弛禁薄其緡王公大貝勒封爵被國恩主之藩部郎玉節

乘輶軒賞功馭有罪動息必上聞治以中國法人以中國人小臣
備職守目覩想所因自古聖人世分土無分民有如馭驛馬銜策
令其馴又如哺雛鷄七子養則均馴由 天子義均由 天子仁
美哉此道行萬古無邊塵

栽絨毯

蜀錦濯始成吳蠶浴還稚何如西鄙人畜牧爲耕織側聞古陸原
裘褐皆有事聖人盡物性因土布其利斂皮始周官供毳較精細
大旅設氍毹案時用贊殷祭然猶令考工淫巧防其繼漢氏定西城
方物入圖記紫氍紅氍氍氍百種厨至今資服玩甯人便體氣
甯夏有栽絨毯中最珍異吾嘗稽其法乃古氍毹製工欲操奇贏
增妍出新意經以輭胞旃緯之木綿縑或又朱其組杭產乃最貴
屈蟠龍鳳文花樣四時媚購者動千緡巧宦與豪隸日索日不供

尺幅萬指萃厥用在何許不中衣與被但云園墅勝主人此高會
隱囊帶綺園重褥薦珠翠別有大地衣已笏肖規制粉袂亘若雲
輦重不易致土木被文繡服妖從此熾不然則人病心其有惑疾
五載窮塞垣民瘼多於蝟而身此悠悠頗得衣租稅底將有限供
趁此無窮費寄謝三數公無爲棄營蒯

小蕩子

近代有歌兒其名曰蕩子翻新出色目非優亦非妓不知夫何時
便串作嚆矢郡中產尤多挾技走都市薄俗固其然頽波何所底
公餘集賓僚百戲盛豪侈當筵召之來矮媚齊稚齒巧習內家妝
垂髻釵鳳紫偏諸小紺袖纏背金約指璫璫置正中步搖行且止
老郎抱琵琶對客據櫓几玉撥風中挑腕下何奔駛維時瓊席間
橫斜不盈咫嬌喉初引聲延鶯爭注視三聲歌未畢擊節爲驚起

上客親點籌斜行白團紙曲終索纏頭四座紛填委更鼓夜將闌
主賓情未已或爲連臂歌或如坐部伎翩翩主觴政宛轉接簪履
一樽侑一曲心醉非甘醴耿耿松炬垂戔戔玉山圯我本非解人
隨眾相諾唯擬將紅豆記漫以香奩比豈知聽三終嘔噦逼心髓
先師採詩樂不盡刪淫靡要知作者心雅鄭各有體梨園諸曲本
存真汰其俚豈聞玩侏儒直欲窮猥鄙禁之固無庸狎之良有泚
柰此嗜痴人饑餒著瘡痂將腐鼠嚇鵲以明珠抵徒令兒女嗤
豈惟壯夫恥邊風故清雄立教須正始胡不唱伊涼灑撥畱犁匕
胡不唱隴頭梅花驛邊使我有數篇詩頗合風人旨諷諭雜謠諺
激昂入宮徵惜無好女伶歌向旗亭裏皇琴一嗑然古調嗟已矣

九月九日蘭州道中懷弟湜甫

行色兼秋晚離蹤踳路長河橋一樽酒關塞五重陽戍柳寒無葉

歸鴻遠斷行且當逐黃菊採擷倚候糧

漠漠大河陰危闌此一臨磧風兼雪起關瘴入秋深疲馬星霜抹
微官老病侵茱萸滿愁鬢嗟爾弟兄心

題菊花溪

歲寒惟有竹松知傲吏心情物外姿不柰中庸胡伯始頓令潭水
帳分歧

季冬至阿蘭鄯國王城南勘獄踰山涉磧往返盈旬淒然有
關塞之感焉以詩紀之

衙鼓破朝醒匆匆草檄行馬寒嘶遠道官久習邊情野闊河西部
山通微外城憑軒申漢約須遣勃溪平

西去循空磧隨行載襍衣人煙野蕭瑟戍火暮低微近塞山能走

衝鷗石慣飛癡酋驚問訊前尹到來稀郡西百里皆沙灘起伏不
常人煙絕少惟平羌鎮北

置戍二處

託宿依山下凌晨到賀蘭邊風緣石起巖雪一天寒遠堡飛鴉入

重城立馬看清時不在險攬取枯棹殘山上望甯蒙等城如咫尺惟陰晦不見

赤木何年種霜花綴短條夕陽纔渡鳥絕徑此通樵地劃中原盡

天橫大漠遙邊牆遺磬在潏潏說前朝赤木口在賀蘭山頂仄僅容車乃甯夏蒙古交界處

明時有邊牆一道今遺跡尚存

白草無人境荒天一使車路盤蝸角迴迹踵兔迹餘野火千靈聚

陰風萬壑曉迢迢區落外貴種問且渠

國典徵鹽舊家私數牧回國以鹽屬供稅牛羊多者為富室席箕平旱海樞策走

春雷霧日腥相雜風沙慘不開牛羊將野色迸入拂廬來地無柳落日斜

時利見解廬數具僅奴驢牛羊數羣置廬前後其人皆聚於廬中

茜席臨溪展旃廬入夜扃冰聲漸輟戶旃廬俗名帳屋戶亦曰帳戶天影卓高

掃一窗通天漢月看成憶胡笳臥獨聽鄉心正愁絕沙塞晚冥冥
夜分殘月入窗忽驚沙併落天黑如漆

甌脫賢王地分藩比內臣山根橫睥睨星市接鉤陳羌女焉支色

胡絃邏迤塵開筵觴桐馬風雪坐生春時風雪頗大國王致館招飲款接甚厚

行役歲將晚婆娑不暫閒傳符稽信宿斂板爲惘痕旅夢三邊外

浮名一郭閒戴星吾早發轅下幾人攀郭外商民雜處事涉蒙古稽程蓋令其首首傳賈務在平情

三日矣

山角晚雲收清笳起戍樓使星天外入關月漢時畱輓腳樽堪把

更番吏合休會須裁樂曲畫壁賭涼州

口外旅宿述懷

去日載星行雌辰指戌仲今來白河道冰絲打霧淞刮面風如刀
塵笳困掀弄西口交三極夷番趾錯綜旁延關路堠小集稀市圉

雷聲捲大磧天眼出深縫如乘恆河桴俯仰千劫送就宿得闔廡
積雪冒枿棟四座寒相偎主人色不動伊古單于庭軍弦十萬控
衣物仰漢繒天性固蹇縱至今新望閒人猶耐饑凍嗟我隨傳車
清班隔鸞鳳因緣北部尉倖藉天庾俸先時朔方州環帶秦上雍
郡良隸羽林惶勇編義從百年承平會可忘苦樂共令職在勸民
板謁亦徇眾負弩健能勝據鞍老可用關月雄佩韃障煙迴飛鞚
葫蘆裝野泉餘颺弋幽洞坂折數乘險天遠惟罄空閒道塲黷深
徂寒駮庖重羸糧無宿舂索米有新湮永夜復何須薄醪卽清供
內景況虛明尺田可耕種干息養膾溫五靈飽心誦穀應從此辟
飲亦不待痛羸將清晏眠權破文書夢

偕富治川部郎至鄂爾多斯游牧案獄途次偶成四首

共有邊庭役遙憑簿節巡君爲典屬國我亦小行人白日黃蘆晚

西風遠雁春前朝戎馬地曾此絕河津

關外望河塹河深北岸懸野昏雞鹿塞冰合鴈鵝泉戰地空尋壘
洪荒不計年三山斜照入半壁是鄜延

蝸角橫尸處瓊酋負弩將笳聲緣欄迴鳥路踏山長筆點春前凍
冠峩微外霜還憑老重舌傳語法三章

帳寒銷不盡歸路已斜曛騎士雙鵬羽奚官萬馬羣邊春迴隴右
關月極秦分老逐西都護橫城看暮雲

秋日寄湜甫

檐帷風靜晚衙清徙倚江皋望遠情載酒烏衣思勝會傳書黃耳
識郵程看萸重九簪偏少夢草池塘句漸成記取湘南聽雨處中
宵依約似彭城

發甯夏詠懷四首示諸子

積雨河關阻尺鱗鄉心誰似宦游人已看邊馬嘶行色更有垂楊
糝去塵莊舄病聲兼越楚田生情緒半君親國恩未報家多難
翹首天涯淚滿巾

衙鼓聲高羽檄催六年宦迹此邐迤一官首鼠成何事四野哀鴻
損吏才治賦陽城餘慷慨哦詩元結愧招徠可憐兩部清笳曲卻
向河橋送我回

邊城春盡曉猶涼振觸歸心逐日忙匹馬去經秦塞遠峭帆從挂
楚雲長胡威有絹充官物陸賈無金作客裝贏得隨行六男子時

五男一孫隨任 曉曉頭玉照琳瑯

吾衰無復宦情濃板謁朝參意久慵便擬煙霞成痼疾肯將腰膂

試龍鍾好官枉憶羊元保薄祿聊同邵曼容寄語家居老同叔謂

滄甫時滯
甫里居 爲余先買蜀山筇

山中作

朝見雲出山暮見雲入山朝暮更出入浮雲不改閒伊余事南畝
結茆此山間苔蘚畫常闕松徑風爲關偶然新雨霽鄰曲過我歡
攜手步移影仰視月在天有酒輒終宵不知何歲年庶幾謝塵縛
從子以安便

觀釣魚圖三首

落落邱樊大隱名當時孔阮配方平上虞江畔垂綸罷便著貂裘
採藥行

柳陌風絲裊麴塵坐看魴鮓咬花頻怪來一曲滄浪古元是江湖
舊散人

曲岸潏梁一水通柳絲風颺釣絲風定知魚鳥忘機處不是桐廬
卽剡中

題張貞女卷

中壘七篇出御府東海以後誰能補有客徵詩節更奇安得手筆
如韓杜吾聞禮經重盟饋厥明贊謁親笄筓不然廟見示有成義
在代禰而體祖又云婚嫁有期日未行以前猶處女塋死女弔衰
服齊既葬而除反其故聖人別嫌有深意以女代婦蓋非古頗聞
此女賢且智吐棄薄俗成創舉女云在室義從親委禽一諾身已
許若令夫天可更移父命亦應同首鼠高謝羣議執愈堅居然奔
喪拜翁嫗當時聞者已驚詫比似芝房玉元圃而況清冰十載餘
履禮之嚴猶履虎世途千里一念差張箴班誠棄如土焦原踵足
那可繼此女至性殆天與南峯先生今宿儒感念亡兒惻新婦賦
詩清激慰幽憂幸爲刪存校宮羽

予授徒石鼓山中衰病相仍時時謝客有人投刺於門謂予

引疾非眞者以詩曉之因寄陳太史每田孫廣文石溪

夢棺得官有何好此心已作焦穀槁紛華百戰知道勝丸彈雙跳
覺身老平生厭事我自知五十投簪計非早幾人漏盡貪行夜不
聞鼓聲眠著曉猥勞輒語肆談嘲豈識羸疾生膚爪漆葉青麴方
術稀菖花紫茸消息杳月食焉能四斗盡手臂長驚半分小投膠
斷鞅不自決畏影逐跡何時了今年孤榜向春開主人一榻爲予
埽因緣上舍分吏俸幸免彈章坐官囊木雁處身材不材委蛇充
腹鳥養鳥迎秋涼雨開夕陰極目江風卷流潦臥思故人身健在
頗與好事窮幽討尺椳取半我自足內丹還七君豈少惟應長假
乞銓曹便合伏枕傳鴻寶他時會謁廣成君與汝晞髮三山杪

題柳華門松陰課子圖

韋平起一經傳家盛忠孝謝公不訓兒屢爲夫人誚平生開晏楹

六籍日儻校漂麥我自癡覆瓿人爭笑垂老沉鍾情闢莊憐子少
置膝相勞苦爾父安足效雖然文字緣此外百無好青箱倘可繼
金紫非所要巨耐生理艱書檄走邊徼苦存析薪望頗愧折蓂教
却思老斲輪語淺近聞道甘苦數中存授受安可到先生河東胃
奕葉毛骨肖昨來春雨餘岸幘門屢造纍纍犀角兒揖客禮嫻妙
新書試展誦功欲半袁豹遙知青雲端平步無魃魃君今文學掾
數載官不調卜舍會城西鶴煙裊茶竈深松列如屏花葉皆四照
哦松對佳兒萬事付高嘯人家種木奴千戶竊封號豈如數鱗鬣
嬌小終合抱待養蚪龍姿毋希桃李曜此詩示阿戎以當辟咎詔
柳莘門手書大字見贈兼索近稿以詩答之

君家諫議元和腳遠孫斑斑識錐鑿未論燕瘦與環肥已覺嬋娟
照鸞鶴剡藤數幅卷送來想見豪端走霜鏐更有細札縈蛇蚓乞

我近詩供手摸君懷自有照夜珠

君手書下筆驚人胸有珠之句見贈

何乃希光到

螢燭嗟予修道百無獲頗習危言窮部略爾時連軫七賢人萬釘

裝帶玉抵鵲帖經溫卷不挂眼麗篆華篇浩盈橐夜深神鬼避鐫

鐫春老鶯花困嘲諑自從塞上隨羽書無復樊南續花萼歸來舊

雨人何處存者雖存類秋籛

謂鄒方亭胡樸園皆物故周槐堂楊道園俱抱病

茫茫生死

若浮休忽忽齒髮今衰落蠅鑽故紙今可笑箭穿魯縞力終薄蒸

湘名勝此來游文字夙緣相倚泊食甘土炭子同病書仰屋梁吾

悔作逝當一掃結習空敲枕江風對寥廓他時乞爲寫黃庭此是

還丹萬金藥

寄懷福建撫軍汪稼門先生

湜甫寄我閩中書閒關千里恣恣俱道公風貌述公語令我撫事

增感吁金城歸來五換歲獨往何異逃空虛平生知遇音響絕剗

咏不到衡茆居羨公敷歷半中外猶復咳唾憐樵漁側身東望懷
彼美坐媿報無明月珠 國家全盛四海謐畫戟坐鎮須文儒經
術飾治古亦有安得名實如公符河西大藩繞沙塞記我墨綬聯
鵷臯向時庶層盡單叟或貰官負嚴民逋自公始至變風尙戶置
水殲庭懸魚上官騶從十減七亭館供張無華腴裁汰冗闢抑僥
倖苞苴問饋皆剔除南金崑玉賤如土鶴綾蓉錦稀商車曰惟州
縣親民吏爾賢我知否我誅大農計簿若眉列不遺租吏滋紛拏
陰陽和調霽雨應沙轍下地成菑畚寶鈔紅粟粲盈眼官私百脈
相委輸其初羣驚若東溼積痼一去長眉舒始信至誠所指注似
挾萬壑澆歸墟公今手持七閩節凜然風采傳萬夫景星慶雲天
下見河潤九里無偏枯信臣南陽視上蔡聲迹雖異理不殊遙知
烏石山前后盡球功德銘海隅琉球日本爭摹捐願最擁戴山靈

扶嗟予天遠阻聞見但望三階瞻斗樞臨風好爲蒼生祝底用兒女言嘔嘔詩成寄弟頓首上知公不笑西家愚

石鼓山中卽事二首

桐蕤已老薄寒收點筆危闌水閣頭青草瘴來花事晚

陸放翁志
粵東三月

有青草瘴
州間亦有之綠波人去櫓聲柔雨絲風絮撩春恨海角天涯入遠

愁小引離鳩彈不得平安傳與置書郵

步履尋春不自聊研磨花露可憐朝新詩脫手無同調望岫關心

有大僚

閩中大吏屢何提甫詢
予山中近況並索詩稿

宮院尙傳紅豆譜仙都虛聽白雲

謠鷓鴣啼雨山深處淚灑

龍髯望九霄

聞孫白沙先生南歸喜而有賦因寄石溪廣文

榆關驕客背爲鮐常恐枯萸著死灰海上羝羊新乳後遼東仙鶴

晚歸來蕭條舊業柴桑里慷慨當年虎觀才識面李邕定何日朝

來心眼一時開

四十餘年析紫荆相逢老淚總沾纓春風何意迴蘆管聽雨當時

話薊城

予在都時石溪示其聽雨集詩乃

氣省兄山海關唱和之作故云參佐三間新隱處阿千

一曲古離聲人生此會須珍重好挽頽陽代燭明

予舊有佳筆數枝頃從行篋檢出鋒穎半落矣詩二首

案頭刪述久相從無復干將舊日鋒漢殿簪持空俯仰秦官朝請
罷雍容已休方朔三千牘可要陳遵數百封酣酒中山頻拂拭紙
窗畱取伴龍鍾

綠沈香膩小斑紋少日登壇屢策勲池上春酣紅杏雨陣中秋裏
皂鵬雲論贊羞比三錢價入夢猶成五色文莫倚狂鋒輕老禿詞
頭燕許不如君

題田鐵舟太守署中菊花六首

稽帷行處物華融
點綴秋光補化工
雨色一簾花百本
官齋清景似山中

山城野色向人秋
羅雀門深駐碧油
餘俸不能支鶴料
強撾花鼓續遨頭

盆枝放罷雨鳴廊
翠滑琉璃菊滿房
五馬試臨高閣望
閒鷗飛過蓼花塘

三堂無事帶經鋤
拄頰從容簿領餘
詩骨自清花自瘦
相將空色悟眞如

太守有採菊詩

五嶽平生憶向禽
三年臥治感秋深
巾車廐馬柴桑路
一種黃花萬古心

看花屢到閣西堂
罨畫屏山引眺長
我亦園林滋杞菊
半供餐餽半聞香

江南曲二首

知君去時久憶妾別時顏清鏡對湘娥爲君梳曉鬟
分風鵲尾舟暖葉魚鱗榜不知妾思深但看春潮長

錢武肅王鐵券歌爲錢氏裔孫某賦

文皇鑑人如鑑容凌煙懸照眞鸞龍圖成二十三將相爵止寶戶
圭桓躬後來漸有鐵券賜制沿開國增侈豐乾元寶應上尊號其
時始奠京西東汾陽臨淮兩勳德手柱天關天褒崇朝廷恩倖不
可數雁門河中俱內訌反者輒賜賜者滅一券何止叢百凶偕昭
以後賞尤濫奴堅脅主如兒童餅師階寵藉阿父行瑜怙亂夷其
宗朱梁事往憤填臆先時帶礪河山重篡臣百死豈足贖貽臭鎖
鑊災鋤銅吳越故家有錢氏簪履百代餘祖風圖示乾甯舊時物
金版玉冊光燭空想見當年提一旅毬馬玉帶眞英雄卯金折脰

妖鳥殪潮迴羅刹如奔蜂惜哉生值唐末造埽機落彗無强弓藥
沒偃息待真主天運有屬人謀窮古來虧盈著深誠煌煌謝表存
謙冲日慎一日教孫子敢恃八議撓至公不然唐陵宋宮闕門牡
冶鑪飛無蹤千秋彝器此傳在發洩豈不關鴻蒙海門綠淨山乳
碧尙憶保障先臣功勤思忠孝慎守寶家乘美溢古鼎鐘嗟我豈
無屈鐵筆抖擻老力愁屏慵綿細展玩再三歎鐫鑑金石難爲工

題李鶴坪明府江亭貯月圖

衡州山水郡襟帶紛周遭剖符得茲土譬騎白鳳邀官書曰煩
吏牒爭叫號上急溼薪束下灌城狐逃其間爲令者夏畦于桔槔
至日對妻子一笑觴卮醪所以七不堪叔夜儕郎曹面癢性多蝨
正懼不得搔何況魚鳥觀棄之如弁髦清泉析縣治一錦分兩緹
井竿猶萬集魚沸成驚濤自從得君侯不用衙策操坐嘯轡常岸

板謁衣惟襃資其經術深埽彼吏道難卽今百聚落大足生鼈毛
公暇謝參佐出亦無旗旄石鼓青嶸嶠合江古亭皋呼僮熱都梁
並待月一篙江水無窮已河漢年年高今古一回首感歎餘楚騷
韻以黃金微舞以切玉刀颺颺出奇語往往追韓豪侯遊月三四
濟勝憑兩尻父老聲慨息府君貧且勞蟾魄厚無溫江波豈足養
云何藜莧腹長與清寒鏖牽挽索我詩添侯頰上毫

首秋登南嶽祝融峯述懷

我從湘南泝蒸川九面九背看衡山山高瘴空翠墮水略似曉鐘
窺煙巖天門夜開誅蕩蕩夢挾白鹿同往還覺來可望不可到自
笑尻腳真驚頑蕭齋十旬困炎暑蚊嚙蠅聒百不安臥思飛霜散
峯頂口嚼玉屑津瀾翻呼兒買舟濟江腹蔽茅簣筍相追攀千巖
谿呀石懸澗是日始覺新秋寒屣屣洞舍再投宿木樨深處最旃

檀其上高真之殿宇傍以青玉之封壇圍石爲礎治鐵螯維護常
恐衝颺千道人龐眉立招手捫蘿遙語青蒼間云此上古赤精子
崇執絳節朝諸藩有時驂龍自游戲雷公砰礚雨上天又云山深
柄插斗二隴都從壁上觀若令宿霧少停滯手攫海日如探丸此
語傳聞良已久匆匆歸去眉爲攢雖然窮劣九千丈拾級踴躍如
翹爾遠矚已愁目力盡攬步更苦身形孱人生隴蜀豈全得往往
豐悴來無端遣情不待續鳬脰食味何必知馬肝山水雖饒有天
賦況與蝸角爭觸蠻平生料理初服早卽事自覺老景寬琪花玉
膏容易致遲我九節青琅玕

題韓鑑湖少室飡松小照

嵩山天地中維絡綜兩戒寥寥二室間風雨萬靈會嫋嫋啟母石
漢唐此封拜榮號豈足加山祇爲噉噉往者少室伯召署徵夢寐
安愚齋詩文集卷二

弟子踵高真逍遙谷鉤帶翹仙望仙曲清角激濤瀨想當啖松時
葉盡根不壞千年脂入土山犬吠光怪先生邱壑情鈴屨謝塵壒
移將神靈物供此几案對玉女窗虛明半馬澗陔夢蒼官老虬枝
古嶺出鳥背夕綺摘明霞朝寒洗沆瀣體元磅礴處了了前期在
吾聞鎮靈宮經卷有科誡合炁忌腥穢米鹽並捐汰君今得所師
一念功百倍從茲養黃芽便好駐韶艾六甲盡供張行廚可坐待
斯圖自珍重慎勿語流輩何時憩九垓從君說方外

題徐香莊畫梅詩卷八首

歲晚官齋雪又風冬衣不壞酒樽空惟餘一種清寒骨摹取乾坤
黯淡工

天迴雪黯補霜丹種種高枝出手寒宦海難除惟熱惱有人冷眼
對花看

廿四番風信短長誰將羯鼓判三郎傷情千載樓東賦第一梅仙
老上陽

陌上寒枝羨暖枝吳歌緩緩媚春遲回頭細雨靈鹽道羌笛梅花
出塞時

空際花臺佛果成撒從天女掌中輕根塵結習依然在差誤高人
過去生

草廩人天鶴骨存休誇鼎鼎在朱門枯腸合把寒花蘸一線生香
氣海溫

徐熙妙墨軋諸黃九朽如君更擅場傳得西湖梅格好他年祠配
水仙王

藥苗鑱柄伴歸休未忍披圖當臥遊聞道花繁惟鄧尉與君同買
五湖舟

送廉訪秦小峴先生還無錫

古人已騎箕尾去今人恩怨紛爾汝論交誰似元紫芝榮利場中
見眉宇先生磊落名家子公望公才繼前武流將筆底千斛泉灑
作湘南萬家雨竭來臥疾返初服江岸統如打五鼓兒啼婦走了
不聞一舸輕風迅飛羽人生如寄膏火灼舊物推排年幾許吾愛
吾廬君入山兩地相望邈吳楚尙記春前數歸日先生執手爲我
語家住常州臨具區四時陂堰澆桑柘先人田廬可耕治敢以山
資累明主此行拍浮五湖脊便欲誅茅九洞府懸將下榻期故
人頗有迎門小兒女堆盤寒具攤畫卷近局黃鷄話農圃杞根吠
客雲窈深鷗鷺尋盟水容與夢醒敏惠感行迹詩付龜輪待刪補
嗟我豈能果此遊摩挲鬢髮星如紉

杪秋寄懷秦小峴廉訪二律

苦爲蒼生禱祀求幙門春候使星流鄒陽右座纔題簡阮籍東平
已倦遊與子白頭成一瞥喟予黃葉臥深秋清資社甕鄴湘酒漱
灑憑銷萬古愁

盞篋離離束筍苗向來濃墨照生綃祇言樽酒前期在叵耐郵籤
一水遙江轉石頭王濬壘湖通海岸伍胥潮懸知鷗外西風擢滿
眼寒花送六朝

畱別史生調梅四首

十載謝浮名青山薜蘿眼猶有揭書牌虹貫滄江遠辱承君家尊
駐節重推輓用子老馬智眷子萬金產毛骨信殊倫杖屨敢辭懶
臺欄點春綰蛩壁韻秋緩茂對一已深三度歲華晚君技幸粗成
予情念當返商歌一揮手梁塵激回轉毋忘今夕歡杯殘燭花翦
涉春我南鷺

明春予應寶郡
濂溪講席之聘

獻歲君北征出處雖異道素業各有

營禹陰惜分寸董餘綜晦明自非曠臯如欲息知無程莫言千里
遠望眼俱崢嶸君當賦長楊奴隸子墨卿我當閑濛汜老著淮南
經

松下不植草上有寄生苗空把獨立心奈此依附牢物理忌遷變
君子慎始交中情苟不亮奚以通媒勞疾毒甘如飴榮華後有茅
惟當味苦口色自鋤其驕企子好音宣慰我白首搔

次山濟時才一第聊逐隊溫公聞喜宴簪花重君惠昔賢始策名
繡亦假顰悅芝鳳不時見見卽天下瑞從竄道彌隆處顯身愈晦
斗印萬釘帶視之若疣贅至今科目人軌躅豔前輩士非長貧賤
豈云苟富貴一朝躡清階長檠照珠翠叔文逡路旁將爲來者愧
今子振翩初樊籠亮非寄

重登峴山作二首

羊公爲郡日置酒此山亭愴然念終古四座皆涕零丹邱不可接
茲山有餘青我亦後來者摩挲石上銘

邊秋曠無極攬策此山阿擬逐黃花去其如衰草何故人同宦迹
相望阻層波憶昨裁詩處登臨感最多

予所乘馬齒長矣適國人從平羅市蕃馬歸充補驛額擇其
一備乘以詩紀之

唐時監牧半河隴鄯善波斯市龍種八坊色隊錦關新揀刷天閑
印飛鳳肅宗討亂由平涼萬騎雲煙虎旅控遂清三輔收二京葉
護北庭爭導從自從宋人失西陲致令夏國劫蕃貢瘴鄉三等羈
縻綱驚下不足補邊空時艱卻向諸路括病瘵豈惟一方痛乃知
古來用武地士馬俱關國輕重我朝通譯四萬餘薄海藩籬一
家共故苑陂陀黍彌望鼓車蹇蹇安用區區官槽棧豆微驛使

封駝管迎送趁虛蕃僧互駢集數齒漢所解調弄平生身輕阪路
險老驥蹄脫沙口凍且將舊秣換新羈未妨赤手馳飛鞚關月斜
時我倦吟憑渠一續晨鷄夢

詠懷二首示弟浞甫

伊余慕微尚藜邇柱不薶匣中三錢筆恥換魯寶刀浮名數十載
忽忽見二毛斗酒祝汙邪六藝春不膏造物乃爾虐戲我輪兩尻
回首空咄咄馬體爭一毫曠載淹荆郢自笑官何曹晨風肅塵騎
宵月仰屋敖多虱不在身辛苦爲人搔瞻望漢江流歸心日悵悵
羈棲倦塵鞅鄉味思土銍平生兄弟心斗粟同春簸怪來虛名誤
薑餅不充餓子行蹟公車我旅戀殘莖分飛千里遊兩載片帆過
足音蚤可喜萍影聚仍破今宵武昌城可忘對床臥要須寤倉鼠
未可事鞍馱愧無買山錢一意經百挫秋月澹簾櫳樊山青錯磨

離鴻古亦有失馬更應賀長吟一笑開取醉萬事墮惟當晏良辰
火急追逋播

王蓬心司馬洞庭落木圖爲劉茶川賦

我家湘南君在澧衡宇相望洞庭水竭來同食武昌魚畏影卻走
如亡逋離堂置酒君動色征雁已度天南隅蓬心司馬風貌別虎
頭善畫復癡絕爲君劇飲氣淋漓搔首湖天向寥泬秋高萬馬波
蹴空瀕洞不與東流東筆底勁風疾如埽山骨刻削彫龍宮北瞻
大洞渚石齒雲鱗粲可數南盼巴陵洲一堆寒碧爛不收晚煙落
日交奔流百圍老樹搖禿鷺或卷如笳懸若旒或怨長笛撩行舟
登高臨水足惆悵榜人魚子交迴眸其餘瀾漫那復記化身槁木
出真意是時西月傾金盆山鬼呶嚶夜打門湘妃速駕乘風旛百
靈斂手不敢捫嗚呼我觀洞庭元氣浩迴薄看渠大力取藏壑千

古君山渠剗却酒殘燈
暖暖幽幕彈丸脫手筆不著披圖暗數郵
籤程我與故人俱眼明何時埽塔騎長鯨

爲幕賓某母題真

先生名德齊范汪十年古錦從奚囊
竭來從事青油幕舉鞭忽忽辭高堂
雙丸一擲如轉瞥長記經行幾時節
複襦著身了不寒當年熨斗猶餘熱
欲歸未歸心咄嗟崩緱馮老貧無家
故教縑素寫愁絕點綴邨巷紛周遮
可憐相望不相見坐對春暉頻掩面
逝將便乞布帆行不令空有門廬戀
隱嚙乎人生百歲如風湍鷗鵲刻烙
眞可歎君不見虞潭投筆事戎鞍
養堂瑤草青斑斕又不見陳畱佳士
茅季偉旦朝作饌餘還度丈夫不得
麾幢守郡州又無負郭田可糴但將
筠管作鋤耒何時鞠脰躬匣牟臨別
摩敦淚沾灑附書區子情蕭颺况君
家山隔淮海子舍流光不相待把酒
澆愁

愁轉多想像愁闌貌應改披圖風雨來遙岑我亦淒涼遊子吟安
陽捧檄非得已西河太守誠何心

上紀觀察四首

簾垂鈴閣曉光融臥治湖山入掌中是處福星占子駿幾年北斗
重韓公黍苗行部千邨雨玉塵論文四座風所愧畢生如并列身
隨滄海得朝東

朱轡千里畫函開牘有碑刊古釣臺漢水葡萄隨戟繞武昌楊柳
人營菽步殘李白三登處心愧孫陽一顧來數載門牆思往事快
予先覩鳳鸞回

金題壓手樺煙紫十載雕蟲刻未成短鬢似華來有信流年如水
去無聲承睚不瞬慙飛衛擁鼻微吟感洛生烏帽天涯頻載酒可
能燕石一參瓊

經年門下濫竽頻贏得緇帷把卷親長爲弱行撾短策似聞當食
感勞薪一冬黍谷常餘暖隔歲辛盤已作春好是文昭園畔路融
風吹徧草如茵

壽李明府四首

綵雲如幄擁高牙令旦秋開玉宇華北里豔歌頻送酒南皮清賞
劇浮瓜才資強力年方盛志切飛騰景未斜好是淥江煙柳道一
身歡滿萬人家

隴西勳伐久翩翩杜曲韋南尺五天楊震德因清吏重君之尊入
歷在觀察

以清印

班彪家有賜書傳頂藏犀角覘奇表御託龍門感夙緣少

伯杏圖師君叔父也視學湖南他日一麾騰上速朱轡雲擁正華

年

步屣論文載酒隨鳳皇芝草見歲華論交浪比公沙穆知我深於

鄭子皮座裏旃檀留竟日江干車馬駐移時王褒門下西州邵能
譜中和樂職辭

簿領稀疏絕點紛玉鉤簾影淡湘紋天東沆瀣承秋曉暑雨蒲團
坐夜分願曲自慙三度爵著書應乞五千文圖南有便隨飛鳥一
種心期海鶴羣

壽黃太母七十

昔余射策遊上京天津橋畔開新鸞泥金一捷宴聞喜春雷夜
轉銅鑼鳴九重朝退步就列韋曲尺五花如醒齋年諸友盡豪
簡猶子齒牒余所兄

湘潭黃君雲受爲子會試同譜儻人猶子也

劇談咻匪不知倦夜

分款數鄉關盟爲陳家風說母範識度似不從釵荆高蹤欲過孟
德耀名論悅聞辛憲英當年附掌已遙跂延鄉地隔心忤忤今來
岸幘此遊歷日交緬懸星再更不須別採濟尼語故應散朗知神

情洞庭霜曉催綠橙壓槽新碧滄長鬢是時張樂設華幌盤壁麟
脯饅駝羹量沙仙巖簪下七紀候良月旬方盈希鞢鞠脰浩羅列
蹕歌聯臂交迴縈登堂親串舞相屬玉躑百軸溪藤瑩揚推京陵
頌東海光價豈止十賚并我時未至媿虛仁仰對照乘珠連纓何
由比似杜陵老句與八座俱崢嶸卻思古人引年義覲縷百福如
璣珵況今烏衣豔朱戟小亦蠟鳳爭飛鳴行看腰魚螭銀袋皂蓋
引掣輜輶輕兩家中表紛照耀仗下競說蘇與程孺人遐壽且未
艾養堂坐待炊青精

落葉十首

得歸根二字

驚秋一葉抱螢飛太息清陰繞檻稀乍逐輕煙浮葦岸忽隨寒雨
到荆扉美人瓊樹憐朝鬢公子西園感夕暉誰識江南庾開府暮
雲惆悵未言歸

平林渺渺淡煙微細雨江頭送雁歸
衰響只隨秋後寂濃陰都向夜來稀
臺空玉鏡憐溫嶠
敗下萼羹憶陸機
無限蒼涼今古意
寒山風景一沾衣

水楓山槭雨依依雲樹關心事
事遠渭北春殘人去後淮南秋盡雁來稀
閨中紅粉催刀尺塞上黃沙臥鐵衣
零落滿天愁歲晚何時登覽一思歸

翠幄修成露葉肥晚來無那影
霏微愁看社燕經秋去怕對昏鴉帶雨歸
漢殿舞殘執扇月吳宮香冷芼蘿衣
年年記取花時節細柳腰肢學帶圍

渺渺江天入望微憑誰登眺寫清暉
蕪城古道寒鴉散梓澤方園宿鳥歸
屐滿青山呼謝客舟浮明月弔湘妃
年年陵谷關愁思忍向長橋問酒旂

婆娑芳意不堪論望盡江南黃葉邨幾日濃遮芳草徑祇今愁苑
淡煙痕寒聲一夜生高館暮色千家冷故園脈脈亭皋迴首處憑
誰牢護到山根

漫天霜雪影飛翻幾度呼童埽石根曾共花陰紛綺席乍隨燐火
暗荒原蕭蕭夜雨空船峽嫋嫋秋風老樹邨欲向前朝歌樂府淒
涼無復舊梨園

漠漠山前載酒尊百年愁思此中繁清秋豔冷芙蓉浦暮雨聲多
薜荔邨故國衣冠殘杜曲大梁書劔老夷門茂林回首皆陳迹賸
對寒潮有斷根

葉落秋槐閉院門空宮遙想駐金根可堪絕塞聞征雁況是寒山
聽夜猿斜日樓船汾水渡西風秋草灞陵原丹鉛果有仙家事擬
向洲頭種返魂

夕陽亭北晚煙昏
生計支離只斷根
三峽風清沈遠塞
九江潮起落寒原
枌榆枉過新豐市
楊柳愁看白下門
五柞上林俱寂寞
征人回首一銷魂

詠志五古二首

鵷雛從南來
闐然嚇羣鴟
鰲鵬飛萬里
斥鷃輒笑之
士亦各有志
誰能苦鞿縻
偃仰小窗閒
天地爲藩籬
清琴一撫弄
悠然見皇羲
危樓聳百尺
託體故不卑
但寄阮生狂
無妨王掾癡

我愛張子房
功成還辟穀
我懷李鄴侯
遺榮託衡麓
持盈有何術
知止乃不辱
名畱金鼎鉉
居入深山腹
往往夏秋間
白雲覆茆屋

題鄭節母卷

清閨大節何踽踽
二十年前痛阮踽
舞鏡照殘鸞
鳳粧舊聲彈破
鴛鴦譜
刀芒風冷聲淒然
可憐纖指隨斷絃
百鍊不作柔腸繞西

風珠淚流涓涓淚乾鐵索爲誰寫望夫石上空磨冶熒熒青燈烏
夜啼泣然卻憶黃泉下冰霜幾度歲時節而今兒大孫枝茁杜鵑
染就紅殷殷猶似當時指上血君不見曹家令女曾截耳大義至
今照青史又不見梁媛堂上稱高行引刀割鼻全貞誠古來節烈
多酸心令我揚摧亦傷情

贈廉訪清公五百字

瑞靄五絲承白階六符炳迢迢銀漢闊皎皎仙槎迴維公經世才
初直尙書省信臣科目貴翁歸文武併花驄出禁垣符竹剖榆嶺
流承五郡肅治鄙三明猛高第書賢良皇華著誠鯁虎拜纔北廳
鵬遷復南溟往月屬初吉羣搖聚不逞竄竄嘯風聲盤瓠吠月影
使君隨府檄夙駕備邊警袁宏露布工劉晏軍儲整羽飛朝屢挿
刁晴夜還誦購賞排潰離首功抑僥倖振旅疇爵均間俗瘡痍拯

陂陀產密箐煙火完舊井社燕識枌榆溪眠望蒲杏越賈生翠通
蠻姬曉鬢靚

丹旰重衮嘉繡衣此兼領執法漢公卿爲憲周翰屏去時韓鵠謚
歸日參狼靜鉗欽息株連主組集晨暝三尺民無寃六條吏克秉
暇日惟古歡崇臺覺春永扁刻摹楚金齊詩說匡鼎輶部風宣鐸
士林星望景嗟予託幘幘浪跡悔馳騁中年忝銅墨竊祿類蛙祖
公餘荷歸休事往如夢醒大袞無程式方寫有頑曠衰髮況飄蕭
暑雨作災責因陳乞假志得遂拂衣請便合狎鷗盟豈敢續鳬脰
但愧老儒冠所學惟土梗故業塵生甑虛名地畫餅躍冶良自羞
識荆一何幸感舊惟心傾陳情得首肯山徙太行巉律回黍谷冷
氍毹資江革馬磨起許靖蒸水浦地靈雁峯秀天挺繁露著董帷
賈月浮米艇文章慚報國鋤耒比耕頽鼠壤容有疏烏擾或餘甍

禮堂釘瓠葉吟榻藉槐癭撫懷乍依依慕德深耿耿孤旦開茲辰
壽星喜見丙松橋還比戶甌窠熟千頃膏澤每瞻郇興歌類和郢
泉分白鶴餘醞挈君山頂頌禱安能詳老禿有毛穎

遣興八首

問字諸生載酒醪造門仙吏擁旗旄文章自播雞林遠不是山人
索價高

嶺雲深處更移居水石檀欒一帶疏三徙陶朱貲巨萬祗應私淑
計然書

灑技醫方更鼎鐘文章那與碎金同宮亭湖裏求如願只在青洪
一諾中

泰山弟子稱應邵北郭門人數廖扶經術修明吾道重竹間花外
有行廚

廬陵陽羨大蘇詞西漢東屯老杜詩安得郗超錢百萬爲予商略
買山資

白首依然面壁勤三元真氣積毫分還憑文武丹爐火點盡凡鉛
編澀文

天教上壽補蹉跎六十年華未覺多負土移山憑老力精誠應是
感夸娥

逸韻迢遙字勁清先生老筆鳳凰鳴還將新曲教雛鳳待聽歸昌
第一聲